

授堂金石文字續跋

授堂金石文字續跋卷三

偃師武億虛谷著

男穆淳編

孫未重校刊

唐昭仁寺碑

正書朱子有撰貞觀四年十一月

碑完好其文紀太宗遣總管羅玉破薛仁果于淺水原唐書仁果本傳王策賊可破遣將軍龐玉擊宗羅喉于淺水原卽其事然碑謂破仁果者仁果主師故也元和郡縣志昭仁寺在縣西十步淺水原上王師討平仁果詔于此置寺碑諫議大夫朱子奢之詞也子奢傳直國子學轉諫議大夫與志合唐會要貞觀二年十一月詔破薛舉于幽州立昭仁寺朱子奢爲銘貞觀四年正月建造畢以碑証之當作仁果

行睦州刺史張琮碑

正書書撰人名氏缺貞觀十三年二月在長安

張琮碑予向未有拓本癸丑歲館東昌及門天津吳生仲蘭以所蓄善本請予書跋琮新舊唐書俱不爲立傳其歷官始末以碑攷之蓋隨代釋褐爲奮武尉從征高麗授朝散大夫尋除新鄭縣令俄遷潁川郡丞歸唐除驛騎將軍口加上開府改授左衛中郎將劉武周之亂以隸戎麾授左三總管兇徒旣殄除左衛長史又授上柱國封南安縣開國侯食邑七百戶又檢校參旗軍副又檢校左領左右中郎將儲閤口口衛率貞觀元年授太子左衛率又檢校右武衛將軍左領軍將軍四年授雲麾將軍十年授銀青光祿大夫行睦州刺史十一年十二月之任在道寢疾

藏於宋州館舍謚曰懿公左三總管之職不見史志舊唐書尉遲敬德傳爲左一馬軍總管程知節傳領左一馬軍總管今此職豈與是相類與唐書兵志高祖初起開大將軍府以建成爲左領大都督領左三軍煬煒公爲右領大都督領右三軍左三總管殆隸于大都督爲其屬貳與碑稱王世充不避世字太宗本紀已巳令曰依禮二名不偏諱近代已來兩字兼避廢闕已多率意而行有違經典其官號人名公私文籍有世民兩字不連續者并不須諱然則初令之行當時遵奉見于碑者信可徵矣

左屯衛將軍姜行本勒石文

正書貞觀十四年六月在巴里坤南山口

碑在遠方摹拓者少近時錢少詹事嘗跋其文云碑多剽

落以余推之僅十餘字墨濕暈不可識案文內所序事跡始末云高昌國者乃是兩漢屯田之壁遺民之所居魏文泰卽其酋豪也又云雖沐仁風情懷首鼠杜遠方之職貢阻重譯之往來唐書西域傳文泰與西突厥通比西域朝貢道其國成見羣掠伊吾嘗臣西突厥至是內屬文泰與葉護共擊之帝下詔讓其反覆今碑所指是也碑言詔使持節光祿大夫吏部尙書上柱國陳國公侯君集交河道行軍大總管副總管左屯衛大將軍上柱國永安郡開國公薛萬均副總管左屯衛將軍上柱國通州縣開國男裴行本等後又言統沙州刺史上柱國望都縣開國侯劉德敏右監門中郎將上柱國淮安縣開國公衛晉錫右屯衛

中郎將上柱國富陽縣開國伯屈昉左武侯郎將李梅岸
前開州刺史時德衡右監門府長王德威等碑旣爲行本
勒石之文故列序從征名銜如是錢君指碑無薩孤吳仁
名疑西域傳誤案碑前二行於正文不屬題云交河道行
軍總管左武衛將軍上柱國口城縣開口公口孤吳仁名
自顯存又有交河道行軍總管左武衛將軍上柱國口城
縣開國男牛進達領兵十五萬與唐書載武衛將軍牛進
達爲行軍總率突厥契苾數萬討之合則當時二人名固
在也但諦認此二行字不似碑正文或行本自紀其功而
二人班師後另書名於此爾行本傳高昌之役出伊州距
柳谷百里其處有漢班超紀功碑行本磨去古刻更刊頌

陳國威靈今碑式與裴岑紀功碑相類信爲漢製無疑行本粗莽可爲嘆息也

萬年宮銘

行書高宗御制御書永徽五年五月在麟遊縣

碑字殘缺尋其可識者有云口軒禁藥駐驂榆川舊唐書

高宗本紀永徽五年春三月戊午幸萬年宮卽其事唐會

要永徽二年九月改九成宮爲萬年宮五年三月一云五月親

制萬年宮銘并序七百餘字羣臣請刻石建于永光門外

從之卽今此銘也制銘在三月立石已當五月會要故兩

存之萬年宮紀言永徽二年九月癸巳改九成宮爲萬年

宮唐書地理志下于乾封二年又書二月辛丑改萬年宮

依舊名以薛仁貴傳按之永徽五年高宗幸萬年宮甲夜

山水猥至衝突元武門後開耀元年復召見謂曰往九成宮遭水無卿已爲魚矣同地而前後異名以見舊史之核因跋此銘附識于此

劉元意造像記

正書在神通寺

記云大康顯慶二年九月十五日齊州刺史上柱國駙馬都尉渝國公劉元意敬造像供養唐書諸公主列傳南平公主下嫁王敬直以累斥嶺南更嫁劉元意宰相世系表河南劉氏政會子元意字深之汝州刺史駙馬都尉政會本傳封邢國公後追襲渝國子元意襲爵尙南平公主高宗時爲汝州刺史此題稱渝國公襲父爵也表傳皆稱汝州刺史記作齊州其由齊州終於汝州與陸君古愚今歲

遊神通寺得磨崖諸小刻十餘種寄予因擇其可攷者略見於此寺在秦山東北八十里崐崙山屬歷城界

南平長公主造像記

正書在神通寺

記上鐫顯慶二年下爲雙行題云南平長公主爲太宗文皇帝敬船像一軀凡十七字公主太宗第三女更嫁劉元意者其稱長公主於時當高宗宜進號也

趙王福造像記

正書顯慶三年在神通寺

記文云大唐顯慶三年行青州刺史清信佛弟子趙王福爲太宗文皇帝敬造彌陀像一軀願四夷順命家國安寧法界衆生普登佛道舊唐書趙王福傳太宗第十三子也貞觀十三年受封出後隱太子建成十八年授秦州都督賜

實封八百戶二十三年加右衛大將軍累授梁州都督不

書當顯慶三年行青州刺史史缺錄也

新唐書同

王行寶造觀世音像記

正書在洛陽龍門

記文刻石一小方其云願他鄉口庶早轉歸寧一切行人
平安孝養蓋因之任在途發此誠念也後題大唐顯慶五
年四月廿口雍州豐泉紀王典衛太口管隊人王行寶奉
爲見存父閭仁母楊氏敬造新唐書紀王慎太宗第一子
此所稱紀王卽其人百官志親王有典衛八人掌守衛陪
從與記合而管隊人不見志意其爲親事府隊正隊副之
異名與

濟度寺尼法願墓誌銘

正書龍朔三年八月

誌云法師諱法願俗姓蕭氏梁武帝之六葉孫唐故司空
宋國公之第三女也唐書蕭瑀傳授光祿大夫封宋國公
詔贈司空是法願父卽瑀也誌云巖庭垂訓早沐慈波鼎
室承規幼明真諦傳載瑀好浮屠法閒請捨家爲桑門則
法願之捨身披剃瑀實導之矣法願以龍朔三年八月廿
六日捨壽于濟度寺之別院乃以其年十月十七日營空
于少陵原之側儉以從事律也捨壽營空及不稱禮而言
律他文記方外者所希

僧思察造像記

記石當乾隆四十三年六月河南溢經睢州水溜旣過淤
土中獲此石今在當州北關某菴內字正書文云大唐麟

德元年七月二十三日比丘僧思察爲所生父母七代父母法界衆敬造阿彌陀像釋迦像各一龕並八菩薩及溫室經願同出苦門緣此勝業共發菩提成无上道睢州古石刻絕少得此足爲搜奇之娛

惠簡造像記

正書咸亨四年十一月在洛陽龍門

記鐫刻一小石字徑寸餘文云大唐咸亨四年十一月七日西京海寺法僧惠簡奉爲皇帝皇后太子周王敬造彌勒像一龕二菩薩神王等並德成就伏願皇幸聖花無窮殿下諸王福近萬伐字體詎乖帝作幸化作花代作伐書石者過也太子卽孝敬皇帝周王皇子顯也

阿彌陀像文

正書上元二年十一月在洛陽龍門

文載弟子宣義郎周遠志等奉爲天皇天后太子諸王遠
劫師僧七代父母敬造阿彌陀石像一龕上元元年高宗
號天皇皇后亦號天后此記當二年宜俗流以此邀媚也
太子爲章懷太子賢上元二年孝敬皇帝薨其年六月立
爲皇太子是也

天后御制詩及書

碑首列天后御制詩一首並序五言所言從駕幸少林寺
觀先妃營建之所者舊唐書高宗紀永淳二年春正月甲
午朔幸奉天宮天后從駕當在此時其云先妃后母楊舊
爲太原王妃故也次御制書一首卽遣三思賁金絹等物
往致寺主僧踵成前營終此功德書旨亦工雅可味後題

司門郎中太孫諮議王知敬書攷紀稱永淳元年二月戊午立皇孫重照爲皇太孫欲開府置僚屬吏部郎中王方慶云竟不立府寮重潤傳開耀二年中宗爲皇太子生重潤於東宮內殿及月滿大赦天下改元爲永淳是歲立爲皇太孫開府置官屬今以此碑太孫諮議亦官屬之一也則紀言不立府寮與傳言自相背也

口口社義碑

正書神龍元年九月在登封縣願陽鎮寶林寺

碑石勒一小記詞多漫漶其可見者沙門釋相師之所立及上爲天皇天后云碑陰載碑主齋主諸名氏左側有稱佛弟子沙門思植洛州武臨縣口口口上柱國佛弟子周歸意名存新唐書地理志潁陽本武林載初元年析河

南伊關嵩陽置舊唐書作武臨與此題合臨林古多同用
鄭志答問臨孝存一作林後漢書光武帝紀臨邑侯讓耿
純傳作林邑是也元和郡縣志洛州顯慶二年置東都則
天改爲神都神龍元年復爲東都此題不遵當時見名猶
稱洛州士人泥古之失也碑向無人搜覓乾隆辛亥歲李
于岸訪識爲予拓一紙始著錄

褒盧正道勅

行書景龍元年十月在
滎陽縣署西偏土地祠

勅字大徑五寸餘文云皇帝問洛州滎陽縣令盧正道卿
才行早著清白有聞夙夜在公課最居首使車昇獎朕甚
嘉之今增卿祿秩以褒善政勉勗終始無替嘉聲碑陰刻
盧公清德文前中書舍人內供奉劉穆之簞蓋當神龍三

年五月至八月改元後又降勅褒美秦正道官至鄆州刺史見唐書宰相世系表今洛陽亦有正道神道碑予參以此勅碑陰所記正道釋褐爲冀州信都主簿轉絳州太平縣丞授陝州司士叅軍改汴州浚儀縣令爲洛州新安縣令又改滎陽縣令攷神道碑恩除洛州新安宰以犯家諱更缺則新安未嘗之官遂改任滎陽也正道歷官始末可紀惜不爲立傳次於良吏猶幸得此勅爲之著其跡也

王徵君臨終口授銘

垂拱二年四月

銘前列季弟正議大夫行秘書少監東宮侍讀兼侍書紹宗甄錄並書舊唐書紹宗傳擢拜太子文學累轉秘書少監仍侍皇太子讀書與此題合新唐書載紹宗歷官惟云

累進秘書少監使侍皇太子不言侍書侍讀義未明也紹
宗兄元宗隱嵩山號太和先生卽此臨終授銘者於紹宗
爲六兄字承真本瑯琊臨沂人晉丞相文獻公十代孫陳
亡過江先居馮翊中徙江都新唐書俱言自瑯琊徙江都
中間陳亡居馮翊失紀又銘內稱昇真潘先生卽潘師正
賜謚體元而此稱昇真蒙其師王遠知號也

封祀壇碑

正書在登封
縣西萬羊岡

碑下截風雨激射殘其年月不可見金石錄作登封元年
寶刻叢編作萬歲登封元年金石文字記作天冊萬歲二
年案舊唐書禮儀志天冊萬歲元年臘月甲申親行登封
之禮禮畢改元萬歲登封据是則立石書石當非刻期可

就顧亭林氏以爲天冊萬歲二年者近之然旣改元萬歲登封則亦不宜稱天冊萬歲二年矣碑薛曜正書名今無存曜附唐書元超傳云聖歷中附會張易之官正諫大夫者是其人也

口龕像頌文

正書萬歲通天元年四月在洛陽龍門

文少損蝕書勢深類褚氏亦唐刻之佳者其文載郭元爽及合家眷屬等缺皇帝兼及七代缺界倉生粵以萬歲通天元年四月八日創首於龍門秀嶺造此尊龕伊川勝源開斯壁塔有繕士焦元操誠心志節巧範真容至九月之朔方乃畢功序無可採今紀其略如是

石龕阿彌陀像銘

正書長安三年七月

銘載大周撫歷歲在癸卯皇帝以至聖之口宏上真之道

云後載金紫光祿大夫行殿中監兼檢校奉宸令瑯琊縣

開國子王璿長安三年七月口日造王無惑書唐書宰相
表長壽元年八月辛巳營繕大匠王璿守夏官尚書同鳳
閣鸞臺平章事則天紀與此同而紀言九月癸丑流李遊
道袁智宏王璿崔神基李元素於嶺南案神基本傳長壽
中爲司賓卿同鳳閣鸞臺平章事爲酷吏所構流嶺南則
同時坐貶如璿者亦猶是矣璿此記當長安三年詎被放
之日已十二年中間必因起復始歷此官而史文不備可
惜也璿以逐臣獲用遂爲女主邀媚於佛氏亦何愚哉

觀世音石像銘

正書長安四年三
月在洛陽龍門

銘前記弟子中山郡王隆業奉爲四哥孃六親眷屬敬造
觀世音石像一鋪勤誠雕刻月面光舒淨口莊嚴金容相
滿以斯勝果資奉四哥孃六親眷屬伏願壽比崇山固同
磐石傍周庠品俱口良緣舊唐書列傳惠宣太子業睿宗
第五子也本名隆業後單名業垂拱三年封趙王開府置
官屬長壽二年隨例却入閤改封中山郡王與此題合其
稱四哥者睿宗也日知錄云唐時人稱父爲哥舊唐書王
琚傳元宗泣曰四哥仁孝同氣惟有太平睿宗行四故也
元宗子棣王瑛傳惟三哥辨其罪元宗行三故也有父之
親有君之尊而稱之爲四哥三哥亦可謂名之不正也已
案此實不起於元宗今銘當長安四年已先施諸石刻又

淳化閣帖有唐太宗與高宗書想汝深情惟吾是念自非
孝情深結孰能以此爲懷

云

下書哥哥勅三字此太宗

以父對其子而自名已稱哥哥宜其繼世羣相沿習不知
易也北史南陽王綽傳兄弟皆呼父爲兄兄蓋在唐以前
又有爲此謬稱者矣隆業爲王德妃生傳言母早終從母
賢妃親鞠養之是記稱孃者蓋賢妃也記爲從來著錄家
所未尋拓李於岸遊伊開始摹出之其他諸小石記凡百
餘種皆以裨予擴異聞搜奇之勤信能過我故用以志喜
如此

河東州刺史王仁求碑銘

正書無年月

碑殘損前列同上功文長子雲麾將軍行左鷹揚衛翊府

中郎將使持節河東州諸軍事兼河東州刺史上輕車都尉新昌縣開國子公一王善寶自書善寶見舊唐書張柬之傳垂拱四年蠻郎將王善寶昆州刺史臻乾福又請置州奏言所有課稅自出姚府管內蓋于其父仁求舊官所區置若此仁求以碑稱安寧郡人其先出於太原因遷居而在焉蒞官之地云招慰奏置姚府已前廿餘州又開夜郎之道綏哀牢之口問罪荒垂口能爲中國輕重時復廢棄但口羈縻舊唐書地里志姚州武德四年置在姚府舊城北百餘步安撫大使李英以此州內人多姓姚故置姚州管二十二州元和郡縣志姚州本漢雲南縣之地武德四年安撫大使李英以此中人多姓姚故置姚州爲瀘南

之巨屏碑云招慰奏置卽指安撫李英也姚府已西廿餘
州志稱二十二州數亦相符惟碑額河東州之名志言黎
州統制五十四州有河東州皆徼外生獠無州羈縻碑謂
問罪荒垂及云時復廢棄但口羈縻則是仁求于河東州
克復其地亦已屬之羈縻故爲此州刺史矣若志所指皆
徼外生獠者疑不盡然碑稱貪戾君口負遠方命口我城
邑州刺史蒙儉實始其口咸亨之際犬羊大擾裒將失律
羣兇莫懲君以奮擊殲厥逋誅之師吐蕃傳咸亨元年四
月詔以右威衛大將軍薛仁貴爲邏娑道行軍大總管左
衛員外大將軍阿史那道真右衛將軍郭待封爲副率衆
十餘萬以討之軍至大非川爲吐蕃大將論欽陵所敗仁

貴等並坐除名碑言裒將失律謂此也吐蕃與南詔蠻壤
接仁求或以舊官于姚府而按師防邊得制其逃逸固宜
有此然不得附傳于史文史有漏也碑額稱大周河東州
刺史碑身又題唐朝故使持節河東州諸軍事河東州刺
史上護軍蓋仁求之歿在咸亨五年八月故稱唐官以終
及立碑已當武后改號故復題爲大周今以碑所書則天
僞制字最多知其立石于武后時也拓本爲青浦王少司
寇所贈遠地邊徼石刻罕能搜剔予故珍惜書之

鎮軍大將軍吳文碑

釋大雅集晉王右軍書
開元九年在西安府學

碑斷裂失其上半文多不屬其中推次成句者有云以秩
授公文林郎適舉從班也又制轉公右監門大將軍神龍

三年又制舉公鎮軍大將軍行右監門衛又奏乞骸骨身
歸常樂蓋以宦寺引年非怙寵於終也其云平均七政恭
踐五朝則上逮高宗皆已服事宮掖矣後又云公夫人之
顧命願不合於雙棺顧命之義上下亦得通稱蓋起于葉
公之顧命又後漢書趙咨傳子胤不忍父體與土并合欲
更改殯祇建譬以顧命祭中郎集朱公叔墓前石碑其孤
野受顧命陳太邱碑臨歿顧命司空臨晉侯楊公碑寢疾
顧命是也文諸子名位俱存于碑者二人口庭局丞騎都
尉處昂行內常侍上柱國處行

京苑總監茹守福墓誌

正書開元十
一年八月

誌無書撰人名氏何夢華藏本傳爲宋拓屬予爲攷之案

茹君諱守福京兆人武太后時選補右領軍衛長上考滿授坊州仁里府別將仍於定陵押當畢授隴州大候府果毅屬開元祚興選舉尤慎特進王毛仲召爲監牧都使判官於是隴右巡檢頻爲稱職遷懷州吳澤府果毅考滿擢授京苑總監守福所歷官証之新書地里志隴州府四一曰大堆此作大候史文誤也監牧都使判官新舊史皆不載惟職官志稱凡諸羣牧立南北東西四使以分統之然則既有使分統必設置都使總領之是其屬固宜置判官矣或云都使卽監牧使異名攷舊書王毛仲傳開元七年進位特進至十七年下詔有內外閑廐監牧都使王毛仲殆元宗前以殊寵榮之非置官爲定員史故不載也開元

十一年四月廿九日奉使隴右道巡監牧六月二日還至京八日卒于長安休祥里第享年三百三甲子四旬有二日以日辰之數記其生年誌銘變例也

太子舍人王無競墓誌銘

誌石近出土存後半數行文云公生於齊長於魏不忘吾黨常操土風嗣子曰新奉成先志以開元十二年歲次甲子十月丁亥朔廿三日巳酉徙殯於魏國葬於東萊之口口夫人范陽盧氏附焉畢湖目檢文苑英華孫逖所撰王無競墓誌後半與此石現存數行同因定爲無競誌銘攷無競見舊唐書文苑傳初應下筆成章舉及第解褐授趙州樂城縣尉歷秘書省正字轉右武衛倉曹洛陽縣尉遷

史轉殿中又轉爲太子舍人出爲蘇州司馬再貶
賓州卒卽約孫逖此文爲之而傳言秘書省誌言麟臺省
皆可以通名誌言右衛不如傳言右武衛之審矣孫逖亦
見文苑傳

元宗御製詩石刻

行書在
汜水

五言詩一章刻紀功頌碑陰前有小序云行次成臯途經
先聖擒建德之所緬思功業感而賦詩後題開元十三年
十月十三日東封之歲前常州江陰縣尉史叙書舊唐書
開元十三年十月辛酉東封泰山發自東都是也史叙金
石錄作艾叙傳寫誤耳中過汜水題詩史蓋以其事微不
具錄

後漢大司農鄭公碑

重刻在
高密

碑前題銀青光祿大夫使持節邢州諸軍事邢州刺史上柱國琅邪郡開國男史承節撰承節以萬歲通天元年奉勅於河南道訪察至高密因父老之請爲文文成未建而卒正議大夫使持節密州諸軍事刺史上柱國鄭杳以開元十三年八月籌度碑石命叅軍劉肫於冬閏十二月建立後復遭隕沒今所收乃金承安五年三月重刻文字完好不見唐時書人名氏据金石錄云雙思貞行書碑蓋略之也按承節撰碑依後漢書鄭康成列傳其引據多與今本不同傳云師事京兆第五元先碑無先字張恭祖碑作欽祖徵爲大司農及與袁紹之會碑並次于與子益恩書

前故太山太守碑作太山守所注周易尙書毛詩儀禮禮記論語孝經碑多周官無論語答臨孝存碑作孝莊不爲父母昆弟所容碑無不字獲親乎在位通人處逸大儒咸從捧手有所受焉碑作大儒得意有所受焉乃歸供養碑作乃歸鄉遇閹尹擅勢坐黨禁錮十有四年而蒙赦令碑無此文舉賢良方正碑作方正賢良公車再召碑以召作徵其勛求君子之道碑無其字末所憤憤者碑以末作凡某亡親墳壘未成碑作吾親案承節後云兼疏本傳之文明其所據蓋舊本也予以文字小有異同及金避顯宗諱允恭易恭祖作欽祖者存而不論若移次傳文則康成建安元年自徐州還高密下直接時大將軍袁紹總兵冀州

遣使邀元

云

及公車徵爲大司農給安車一乘所過長

吏送迎元乃以病自乞還家下宜接元後嘗疾篤自慮以書戒子益恩比事屬詞乃得其實是碑遠勝今本一也所注儀禮周官禮記傳不言周官錢少詹事廿二史攷異云三禮皆康成注流傳至今乃本傳有儀禮禮記而無周官此轉寫之脫漏今以碑証之實有周官信知唐本初無訛是碑遠勝今本二也不爲父母羣弟所容案傳前言元少爲鄉嗇夫得休歸常詣學官不樂爲吏父數怒之此出自史文宜書其實使康成以此見於書詞其語似於親有愠心矣及檢碑無不字始悟康成自述吾家舊貧爲父母昆弟所容猶言幸爲親包覆成就乃得去廝役之吏游學周

秦之都蓋不欲舉親之過如此自後校書者因前不樂爲
吏父數怒之遂疑此書爲父母昆弟所容語意不相符輒
妄加不字踵謬至今不悟是碑遠勝今本三也臨孝存作
孝莊攷臨孝存名碩北海人碩義訓爲大古莊壯爲一字
壯亦大也名字相配則莊爲近之又存與莊字形涉似亦
或致誤而後人因循莫正是碑遠勝今本四也傳稱亡親
出於康成自述亦非孝子不忍死其親之義碑止作吾親
遠勝今本五也承節所爲文非獨於蔚宗書據其善本當
時謝承薛瑩劉義慶華嶠謝沈袁山松諸人擬定者俱存
亦必有以對勘叅稽得之故於此必其非妄爲竄易也鄭
杳見宰相世系表北祖房官至婺州刺史劉肫亦見表彭

城房官至汴州刺史予既依碑疏其事更爲重次傳文於左

董卓遷都長安公卿舉元爲趙相道斷不至會黃巾寇青部乃避地徐州徐州牧陶謙接以師友之禮建安元年自徐州還高密道遇黃巾賊數萬人見元皆拜相約不敢入縣境時大將軍袁紹總兵冀州遣使要元大會賓客元最後至乃延升上坐身長八尺飲酒一斛秀眉明目容儀溫偉紹客多豪俊並有才說見元儒者未以通人許之競設異端百家互起元依方辯對咸出問表皆得所未聞莫不嗟服時汝南應劭亦歸於紹因自贊曰故太山太守應中遺書而稱弟子何如元笑曰仲尼之門考以四科同賜之

徙不稱官閭勸有慙色紹乃舉元茂才表爲左中郎將皆
不就公車徵爲大司農給安車一乘所過長吏送迎元乃
以病自乞還家元後嘗疾篤自慮以誓戒子益恩云五
年春夢孔子告之曰起起今年歲在辰來年歲在巳旣寤
以讖合之知命當終有頃寢疾時袁紹與曹操相拒於官
度令其子譚遣使通元隨軍不得已載病到元城縣疾篤
不進其年六月卒

紀太山銘

八分書元宗御製御書在太山

紀太山銘字大四寸舊唐書禮儀志元宗製紀太山銘御
書勒於山頂石壁之上者是也今以其文與志參較朕宅
位十有四載石本作宅帝位若涉大川石本涉字下多於

字幸和庶尹石本相作衡禮莫盛於告石本禮字上多謂
字告字下多天字震疊九寓石本作震疊以至岱宗石本
至下多于字實萬物之始石本作實爲天地之孫羣靈之
府其方處萬物之始爲蒼山而祈福石本而作之呼萬歲
石本呼作千慶合歡同石本合作蒼廼陳誠以德石本無
廼字懿爾幼孫石本爾作余刻金石石本石作記冀後人
之聽詞而見心石本無冀字又作後之人衛我神主石本
衛作衍中宗紹運舊邦惟新石本於此下多睿宗繼明天
下歸仁二句或禪亭亭石本亭亭作奕奕儒書不足石本
不足作齟齬案文之異者容所據見或有不同若銘列祖
而獨遺睿宗則下文恭已無爲正以睿皇禪位爲詞若接

屬中宗義便不相屬又儒書蠲黷蓋指議封禪儒生所錄故以醜惡鄙之作史者嫌其過詆儒書遂刪易以不足當之斯不達其旨矣銘後題開元十四年銘叙又作十四載年載通稱互文非如天寶元年改年爲載始有專名也

嵩岳少林寺碑

行書開元十六年七月今在登封

碑前列銀青光祿大夫守吏部尚書上柱國正平縣開國子裴淮撰文并書其文叙少林寺興建始末歷代御書題榜最詳中言寺西北五十里有栢谷壑居晉成塢在齊爲郡王充僭號署曰豫州太宗文皇帝軍次廣武僧志操惠賜曇宗等率衆以拒僞師抗表以明大順執充姪仁則以歸本朝太宗嘉其義烈頻降聖書宜慰今碑上層刻有秦

王告少林寺主敎卽此碑所云頻降聖書宜慰也充姪仁則附舊唐書王世充本傳蓋世充僭號先封同姓以憚子仁則爲唐王及仁則爲僧衆所執不見于史賴此以補缺文又碑言晉成塢在齊爲郡史志皆不見此疑當時設置更易難以悉錄耳准新舊唐書並有傳惟封正平縣子史從畧不書

靈運禪師功德塔碑銘

碑前列宣德郎試大理評事崔琪撰聖善寺沙門勤口序上人諱靈運蕭姓蘭陵人梁武帝後皇考蕭魏州恒農縣尉又云因遊嵩山至少林寺有始終之意焉會舅氏棣於高口似平字而上人遂緇於此郡竟移隸此寺以副乎夙心

又習禪決於龐珪大師粵開元十有七祀夏五月二十二日告逝門人堅順獨建靈塔奉遺教也宰相世系表崔陲子下有琪字庭秀與此時較遠疑更爲一人非此撰碑銘者也

敬節法師塔銘

塔銘予所收得已裝潢成帙無撰書人名氏文云維大德俗姓盧諱敬節范陽人也祖尙書遠葉栖志邱園父樂司徒季英閑居遁世愍於稚子遇以羣流放令出家投虔和上受業年甫什歲日誦千言至二十九入道具臘寺舉都維那二十載清拔僧務造長廊四十間以開元十七年七月十五日歿於私房春秋七十有五窆於神和原按敬節

七十五示寂在開元十七年己巳距其生實當高宗永徽六年乙卯奄忽汨沒尙賴塔銘畧具其名系然則語言文字亦何負於彼教哉

北嶽神廟碑陰

八分書在
曲陽縣

碑陰第一層紀段使君德政是爲博陵崔鑲詞並書及篆其石斷裂文微有不屬而字尙完具首序段公諱愔字崇簡五代祖榮字子茂後魏十遷都督一拜尙書二統將軍六爲刺史儀同三司食邑八百戶追贈左僕射大尉公武威王謚曰景配享高祖四代祖韶字孝先魏驃騎大將軍尙書右僕射以功封平原郡王口司徒大將軍尙書令增邑二千戶領太子太師除大司馬錄尙書事謚曰忠武曾

王父濟字德堪歷仕齊周隋並口開府儀同三司大將軍
相繼五州刺史齊封上郡王諡曰貞王父乾字寶元唐刑
部郎中遷給事中刑部侍郎尙書左右丞洛州刺史建都
授洛州長史烈考嗣皇韓王府功曹潤州司士滄州東光
縣令按榮韶濟史並有傳齊書稱榮授鎮北將軍定州刺
史轉授瀛州尋行相州後爲濟州轉行秦州凡五爲刺史北史則云
由定瀛二州尋歷相濟秦是碑所紀六爲刺史較二史多
書一州二史俱言諡曰昭景碑惟著諡曰景此又爲少異
韶歷官北史傳與碑合其封平原郡王而齊書本傳亦稱
爲平原郡王濟字德堪齊書稱韶第七子德堪而漏其名
北史又稱亮字德堪名亦與碑異至爲五州刺史與封王

及諡二史皆未之錄碑所據當本其家牒書宜詳審於史也
借居官以碑証之大聖天后封中告成公以開清高才
貌兼秀調魏州叅軍轉蜀州司法岐州司兵華陰奉天二
縣令轉少府口監原州刺史京兆少尹定州刺史上柱國
兼北平軍使而頌詞所紀微爲溢美矣碑殘剝失其年代
按碑陽載張守珪加輔威大將軍左羽林大將軍在開元
二十三年今碑我唐下缺尙有二年歲次乙亥閏十一月
壬午朔二十三日癸卯建字則碑之立卽開元二十三年
也金石文字記列入無年月蓋失攷也

碑陰下截記文

下截載諸屬吏名其詞亦用駢體屬頌不具錄名之可見

者別駕符子珪轉金州刺史長史高元奉司馬李夔錄事
叅軍崔曦范光烈司功叅軍李真司倉叅軍呼延傑尹光
暉司戶叅軍崔曦陽楚容車元福司兵叅軍張景運司法
叅軍梁恁張嗣臣攝官義豐縣尉宋季敷司士叅軍李鎮
韋望叅軍盧邕龐涉王銳李孚博士宋殷禮錄事史歸宗
梁明禮市令張知什恒陽縣令裴延祐丞李免主簿郝英
質尉王嶠尉夏侯庭主簿令牛懷贊按此皆定州刺史所
屬吏也定州爲上州誰之舊唐書職官志別駕長史司馬
錄事叅軍事各一人相符而碑不載錄事三人
唐書百官志錄事二人
人司功司倉司戶司兵司法司士六曹叅軍士各一人
百官志司戶叅軍事二人司法叅軍一人
事二人又多司田叅軍事一人而碑於倉曹有二八戶曹

有三人兵曹有二人經學博士醫學博士各一人

百官志醫學博士

士一

而碑惟載博士一人亦不言其何屬蓋官制更張改

併因時權事而不齊一雖兩史所收亦不備矣碑不列司
田叅軍定非屯田之州不置營田使故司田無所置也諸
曹叅軍不作叅軍事省文也李夔見所題恒嶽晨望有懷
詩稱爲定州司馬與此碑合而詩云景福如光顧私門當
復俟然則夔先世固有封爵旣失而祈祐於神其可推見
又如此

北嶽神廟碑

八分書

碑首列陳州長史鄭子春纂博陵崔鎮書安喜縣尉李述
篆後列輔國大將軍左羽林衛大將軍幽府長史兼御史

大夫經畧軍支度營田節度副大使兼河北道採訪使南陽郡開國公張守珪唐書守珪本傳徙幽州長史河北節度副大使俄加採訪處置等使二十三年入見天子加輔國大將軍右羽林大將軍以碑証之當作左羽林又開國南陽已列公爵史皆失書傳稱幽州碑作幽府幽州爲大都督府二名亦可通也經畧軍在幽州城內支度營田攷舊唐書職官志凡天下邊軍有支度使以計軍資糧仗之用每歲所費皆申度支會計以長行旨爲準劉全諒傳授容奴柳城郡太守攝御史大夫平盧節度支度營田李希烈傳加御史大夫充淮西支度營田觀察使李自良傳河東節度支度營田觀察使嚴綬傳充河東節度支度營田

觀察處置等使今守珪所領亦猶是也世多混以支度同
于度支故附著之碑又載高陽人田登封於此祈福神君
降形而謂之曰吾方助順取彼殘孽殄殲元惡懸諸藁街
云傳稱守珪次紫蒙川大閱軍實賞將士傳屈刺突于
首于東都卽指其事而神君降形之言史不具錄以其涉
妄也

三藏無畏不空法師塔記

正書在洛陽開元二十五年八月

記云大唐開元二十三年三藏無畏卒春秋七十有九詔
鴻臚丞李峴監護喪事塔于龍門之西山廣化寺藏其全
身舊唐書李峴傳稱峴樂善下士有吏幹以門蔭入仕按
此記詔鴻臚丞蓋其門蔭之資也記後有論引資治通鑑

真觀中有僧自西域來善呪術云蓋記石已毀爲宋人

重刻非獨載司馬公書并仁宗諱已避之矣近人仍目爲

唐刻誤也貞觀作真觀避仁宗諱使然

濟度寺尼惠源神空誌

開元二十五年十一月楊休烈撰姪定書

誌載惠源宋國公蕭瑀之孫女父欽給事中利州刺史欽

見宰相世系表作鉞字形涉似誤耳又載曾門梁孝明皇

帝案段行琛碑曾門德濟蓋以曾祖爲曾門唐人多有此

稱矣誌題惠願和上証之通俗編引廣異記大歷時某寺

尼令婢往市買餅見朱白勸問云汝和尚好否又云聞汝

和尚未挾纊今附絹二疋與和尚作寒具婢承命持絹授

尼則唐時尼亦稱和尚又見于此誌且在大歷前翟晴江

未採入也

元宗御注道德經石刻

正書開元二十六年十月

碑首層列元宗二十年勅有隨所意得遂爲箋註

云分

老子道經卷上德經卷下亦與古本相彷彿陸放翁題跋

云晁以道謂王輔嗣老子曰道德經不析乎道德而上下

之猶近於古今此本已久離析然則宋已失輔嗣定本今

邢氏論語疏引老子德經云天網恢恢疎而不失此其可

徵之一也然又攷漢書註如顏氏於魏豹傳引老子道經

曰國家昏亂有忠臣田橫傳引老子德經曰貴以賤爲本

高以下爲基是以侯王自謂孤寡不孤楚元王傳引老子

德經云知足不辱嚴助傳老子所謂師之所處荆棘生之

者也師古曰老子道經之言也楊雄傳貴知我者希師古
曰老子德經云知我者希則我貴矣酷吏傳老氏稱上德
不德是以有德下德不失德是以無德法令滋章盜賊多
有師古曰老子道經之言也下士聞道大笑之師古曰老
子道經之言也西域傳註老子德經曰天下有道却走馬
以爲糞蓋其所引以道德分篇者若此而與釋文題道經
音義者並合又賈公彥周禮師氏疏亦以爲老子道經云
道可道非常道其下案德經云上德不德是以有德章懷
太子注後漢書其於翟酺傳也則又謂老子道經曰魚不
可以脫於泉是數子於初唐時並同所證夢真容碑稽之
道經以慈爲寶
其必襲自晉宋舊本如此碑所分題固有據也立石者爲

守易州刺史田仁琬附列守易州別駕周憲兼高陽軍副使鄭景宣試司馬杜欽賢名存仁琬見德政碑云琬字正勤與此作雙名者微異

尼靈覺龕銘

行書開元二十六年十月在洛陽龍門

石殘剝過半銘題有大唐都景福寺宇文字稱和上諱靈覺俗姓下缺又載懇誠至到天后嘉尚及辭榮出塵字蓋以世族逃諸空教者後云澡浴換衣焚香端口時春秋五十二遂於龍門西巖造龍季弟崇正哀友于之口重悲同氣之情深則是銘龕者爲其弟也

尙書祠部員外郎裴稹墓誌銘

誌銘前列族叔禮部員外郎拙撰書拙見宰相世系表洗

馬裴房內有肫禮部郎中卽其人也誌序禪之高祖定曾

祖仁基祖行儉父光庭歷官與新舊書合惟舊書及表以

定高爲二名

張說裴行儉神道碑亦云大父定高

此誌作一名曰定張九齡

誤光庭神道碑與誌符未審孰得其實而仁基在隋兼河

南道討捕大使亦未之及禪字道安開元初舉孝廉高第

弱冠勅授左千牛備身轉太子通事舍人調補太常寺主

簿除京兆府司錄拜起居郎遷尙書祠部郎以開元廿八

年十二月十九日終於長安光德里私第禪新唐書有傳

云累遷起居郎俄受祠部員外郎卒

惟德輿撰裴倩神道碑稱禪祠部員外郎

以誌証之前爲舍人主簿司錄傳皆略而不紀其字道安

亦失錄而祠部員外郎表作司勳員外郎誌載太師公直

道不同存亡交變明主優恩禮時列害其公忠定諡之辰
將沮其美君晝夜泣血號訴聞天特降綸言以旌其實詔
改諡曰忠獻舊唐書光庭傳附此事光庭與蕭嵩爭權不
協及爲吏部奏用循資格並促選限云太常博士孫琬
將議光庭諡以其用循資格非獎勸之道建議諡爲克時
人以爲希嵩意旨上聞而特下詔賜諡曰忠獻据誌文實
由禪之泣訴上聞而改非出之時人私議也新唐書旣爲
稹立傳而不載此文禪之孝感茂以聞矣誌載嗣子倩等
倩見表及傳字容卿度支郎中

授堂金石文字續跋卷四

偃師武億虛谷著

男穆淳編

孫承重校刊

唐趙思廉墓誌銘

正書天寶四載十月

墓誌裝潢本不列書撰人名文云公諱思廉字思廉天水人高祖修演魏司徒府長史清水郡守贈驃騎大將軍開府儀同三司秦州刺史曾祖士季周秦王府司錄亳州總管府司馬陸安郡太守儀同三司祖構隋口侍御史民部郎中毛州刺史父素隋孝廉丹陽郡書佐皇舒州司馬按周書秦王贊字乾信初封秦國公建德三年進爵爲王故開府置官屬有司錄之佐也思廉弱冠明經登甲科解褐鄭之滎陽主簿換益之雙流稍遷河南府登封尉拜監察

御史推事忤旨左授荆府法曹大足元年八月十二日寢疾終於南陽之旅舍春秋六十有六夫人博陵崔氏以天寶四載十月十三日合塋萬安山陽二子悅歷監察御史江陵安邑二縣令坦之濟陽尉思廉家世事跡略可附見如是其荆府法曹者高祖子荆王元景也思廉少由明經登甲第攷新唐書選舉志明經亦爲四等蓋承前文試秀才上有上上中上下中上之目不數所謂甲乙也杜氏通典按令文科第秀才與明經同爲四等進士與明法同爲二等然秀才之科久廢而明經雖有甲乙丙丁四科進士有甲乙二科自武德以來明經惟有丙丁第進士惟乙科而已予証之誌文思廉旣卒於大足元年春秋六十有六

其生實當貞觀十年丙申弱冠明經中第亦在永徽末顯
慶初矣何云武德以來明經無甲科也杜氏亦嚴之未審
矣

梁懷貞造像記

正書天寶十一載二月
在汝州陵頭街淨因寺

記石存置淨因寺後殿李于岸摹得之文略云臨汝郡梁
縣萬歲鄉脾陽里人清信弟子梁懷貞妻王氏及兒女等
先發誠願敬造阿彌陀佛于茲脾陽里者當在脾山之陽
也唐鄉邑之名流傳于今甚矣

楊珣碑

八分書元宗
御製御書

碑下截剝蝕前云公諱珣字仲珣華陰人曾祖汪隨國子
祭酒吏部尚書烈考志謙青城令又云開元五載遘疾終

於元武之縣廨天寶十二載三月追贈公武部尚書追封鄭國公舊唐書楊國忠蒲州永樂人父珣以國忠貴贈兵部尚書案職官志天寶十一載正月改吏部爲文部兵部爲武部則十二載追贈應從武部史以爲兵部未詳核也碑稱仲珣華陰人蓋舉其族望故與傳稱永樂有別開元未改年爲載此稱五載或追紀書之

東方先生畫贊碑陰記

正書顏真卿撰并書天寶十三載十二月在陵縣

碑陰記云殿中侍御史平公冽監察御史闕公寬李公史魚右金吾胄曹宋公審咸以河北採訪使東平王判官巡按狎至真卿候于境上而先生祠廟不遠道周亟與數公泉家兄淄川司馬曜卿長史前洛陽令蕭晉用前醴泉尉

李伯魚徵君左驍衛兵曹張燧麟遊尉韋宅相朝城主簿
韋夏有司經正字畢曜族弟渾前參軍鄭悟初同遊茲廟
舊唐書安祿山傳引平列李史魚在幕下以此記推之又
有閻寬宋審二人與平李並爲判官則祿山包藏禍心壁
後置人蓋其夥哉曜卿見杲卿傳開元中與兄春卿弟曜
卿並以書判拔萃超等者畢曜見酷吏敬羽傳與毛若虛
裴昇畢曜同時爲御史又叛臣喬琳傳郭子儀表琳朔方
府掌書記與聯舍畢曜相掉訐宰相世系表曜侍御史今
碑作曜不從日按唐書畢構傳子玢世系表抗與曜爲一格疑皆從火碑所書
爲正杜集存沒口號畢曜仍傳舊小詩曜一作耀亦耀之

轉

雲麾將軍劉感墓誌銘

行書天寶十二載

誌石近出土完好前列河東進士李震撰宰相世系表列

震泉州刺史

案表又有震起居郎未知孰是

集賢院上柱國席彬書舊唐

書職官志有集賢殿書院卽誌所稱集賢院也院設官各

有職任不聞以勳官備員蓋亦志文所闕與劉感誌稱其

當元宗撥亂之開元提劍以從遂使羣兇授首

云

開元

元年秋七月甲子太平公主及岑羲蕭至忠竇懷貞謀反

伏誅感當時從討立功始基於此遂授翊麾副尉大桃戌

主遷右衛寧州彭池府左果毅改昭武校尉行左衛陝州

曹陽府折衝轉左領軍衛同州襄城府折衝拜寧遠將軍

左武衛翊府右郎將遷明威將軍右龍武翊府中郎將轉

雲麾將軍右龍武軍將軍上柱國封彭城郡開國伯食邑
七百戶命圖形麟閣卒葬咸寧縣黃臺鄉之原凡誌所書
感歷轉階職由從七品下進正六品上又進正五品下又
進從四品下最後轉從三品上無一越級者攷感初從元
宗撥亂事定僅授翊麾副尉蓋非有殊勲可紀如碑所云
殆亦子孫文飾之辭欲耀於人與黃臺鄉見元載傳稱萬
年縣界此作咸寧地里志萬年天寶七載改爲咸寧乾元
復舊此當天寶十二載故依改名元載當大歷十二年故
仍舊稱也史例之嚴如是惟大桃戍新舊書地里志皆遺
此名其屬何州不可攷矣

內常侍孫志廉墓誌銘

正書天寶十四載
六月在咸陽縣

銘文字完好前題朝議郎行陝郡平陸縣尉申堂構撰文
林郎行文部常選上柱國南陽韓獻之書錢少詹事攷宰
相世系表有吏部常選又有兵部常選者意其爲選人之
稱予案唐書選舉志由學館者曰生徒由州縣者曰鄉貢
皆升於有司而進退之

云

此歲舉之常選也蓋韓獻之

先有勲階又就歲舉而隸於文部故曰常選也與又叙云
公諱志廉字惠達富陽人也適褐授儒林郎拜內謁者監
俄遷朝議大夫守內常侍以天寶十二載十一月終於咸
陽縣來庭里之私第卽以明年夏六月合塋長樂原案長
安志天寶七載改萬年縣爲咸寧縣縣惟胄貴里神鹿里
見於志此誌所載來庭里蓋闕錄也長樂原据是縣長樂

坡在縣東北僅一十里此稱爲原蓋一地耳釋褐作適雅
量作重書石者誤也

撰忠寺寶塔頌

至德二載十一月

頌文自左起云御史大夫史思明奉爲大唐光天大聖文
武孝感皇帝敬无垢淨光寶塔頌其文則范陽府功曹叅
軍兼節度掌書記張不矜撰書舊唐書地里志范陽郡爲
大都督府功曹列於府屬是宜結銜變文言府矣不矜見
史思明傳令耿仁智張不矜修表請誅光弼以謝河北者
修表卽書記之任也與碑可相證後又列承奉郎守經畧
軍曹叅軍蘇靈芝書新唐書地里志范陽郡城內有經
略軍今此題與志合而靈芝當開元二十七年猶稱前行

易州錄事鐵像碑領至此爲經略軍之屬蓋亦凶孽引置幕下矣

邱據題名 正書

右邱據題名完好無缺文云陳鄭澤潞等州節度行軍司馬邱據再隨使主赴上都朝謁往來皆虔拜神祠時寶應二年六月八日記案寶應肅宗改號是年帝崩代宗以四月卽位明年七月改元廣德故于六月猶稱寶應二年也方鎮表寶應元年澤潞節度增領鄭州又增領陳邢洺趙四州是年以趙州隸成德軍此題載陳鄭据增領者言之與表相符惟使主不言何人攷舊唐書郭子儀傳上元三年二月河中軍亂遂用子儀爲朔方河中北庭潞儀澤沁

等州節度行營兼興平定國副元帥充本管觀察處置使
出鎮絳州表載上元二年澤潞增領沁州子儀于三年二
月爲潞澤等州節度然則使主殆爲子儀也傳載子儀辭
赴鎮入見肅宗遂至絳擒其殺國貞賊首王元振數十人
斬之及代宗立入朝充肅宗山陵使據稱隨使主赴上都
朝謁往來當以此與據見唐書藝文志有邱據相國涼公
錄一卷李抱玉事據諫議大夫蓋以其所終之官書之
劉士深等西嶽題名

右題名正書文云前藍田縣尉劉士深前奉天縣尉劉士
清京兆府倉曹叅軍李適前告成縣丞李逖商州豐陽縣
令李遙下邳縣尉李遠時廣德元年三月紀按此題列名

皆以地望爲先後藍田奉天兩縣尉居首重京邑也告成
縣丞書在豐陽令上者告成屬河南府亦爲東都故耳北
嶽神廟碑有安喜縣尉李述與此稱告成縣丞者或卽其
人以否未可知也新唐書藝文志李遠詩集一卷字求古
大中建州刺史若以廣德紀元方爲尉則至大中時八十
餘年矣疑別爲一人

郭敬之廟碑陰

碑陰正書無書人名氏載敬之子孫曾孫凡三世石墨鐫
華跋此碑獨詳子儀歷官於本傳爲備予更以新唐書宰
相世系表校之表載子琇失其官勲今碑第一層首列男
昭武校尉守絳州萬泉府折衝都尉上柱國卽子琇也表

載子雲左領軍將軍碑列游擊將軍左武衛將軍上柱國
表載子瑛延州司法叅軍碑列朝議郎行延州都督府法
曹叅軍表載子珪無官勲碑列朝議郎行衢州盈川縣尉
表載幼賢副都護碑列銀青光祿大夫衛尉卿單于副都
護振武軍使朔方左廂兵馬使上柱國贈太子少保表載
幼儒成都少尹碑列正議大夫光祿少卿兼漢州別駕賜
紫金袋上柱國表載幼明少府監太原公碑列銀青光祿
大夫太府卿上柱國太原郡開國公表載幼冲太子詹事
碑列銀青光祿大夫試鴻臚卿上柱國又表於子雲下載
子瞻幼冲下載幼謙而碑無之第二層列諸孫首爲曜銀
青光祿大夫試太常卿上柱國太原縣開國公表載太子

少保太原孝公次朝議郎守通州別駕騎都尉賜緋魚袋
睦表載睦無官勲次特進兼鴻臚卿贈開府荊州大都督
上柱國玠表載鴻臚卿同正次雲麾將軍守左武衛大將
軍同正上柱國昕表載檢校左僕射磧西節度次特進試
鴻臚卿兼御史大夫左散騎常侍上柱國太原縣開國公
晞表載工部尚書次正議大夫試光祿卿贈開府太常卿
清源縣開國男肱表載試鴻臚卿次銀青光祿大夫行少
府少監樂平縣開國男晤表載兵部郎中次宣德郎試太
子中舍人賞緋魚袋昉表載試太子中舍次銀青光祿大
夫試殿中監駙馬都尉廣陽縣開國男曖尚昇平公主表
載左散騎常侍駙馬都尉次奉義郎試太常寺協律郎贊

陽縣開國男昺表亦載試協律郎晉陽男次宣德郎試左
衛率府兵曹叅軍曉表亦載試左衛率府兵曹叅軍次銀
青光祿大夫試秘書監太原縣開國男曙表載右金吾將
軍祁國公次宣德郎行京北府叅軍太原縣開國男昀表
載鴻臚少卿次朝散大夫試秘書著作郎壽陽縣開國男
映表載右庶子壽陽尹次朝請郎試太常寺協律郎暉表
不列官勲第三層碑列曾孫僅三人通直郎行將作丞銳
朝請郎守太府少卿銑朝請郎守國子監主簿名已殘劍
表載銳嘉王府長史銑試太常主簿凡此互爲詳略實足
以佐証史表而壽陽尹唐於縣官不稱尹表誤記也子琇
子一人璉子英子一人昉至如昉曉爲幼賢子昀暉爲幼

明子昕爲子雲子餘皆汾陽王子也

田尊師碑

行書無年月在富平縣美原鎮

碑過漫漶予細識其文云尊師七歲依楊尊師學道後于

中宗大聖大昭孝皇帝時登壇舊唐書中宗紀天寶十三

載二月改諡太和天聖昭孝皇帝與碑稱昭孝合新唐書

作宏孝蓋非也又敘尊師醫療爲人除沉痾及諷導愚滯

時有道門使檢校殿中監沖虛申先生奏尊師爲四方妙

選道門置使史文所未及可据以補遺碑又追紀上元歲

大浸尊師爲食以待窮者凡所蒙活數逾千計於是搢紳

處士孝廉秀才等廿八人僉謀刻石

云

後又有口書汾

陽王子儀兵部尙書李口中書侍郎元公載黃門侍郎王

公縉京兆尹子頤諸名顯存元載傳代宗卽位遷中書侍郎王縉傳廣德二年拜黃門侍郎同平章事于頤傳代杜濟爲京兆尹縉與頤皆曲事元載而碑于此三人又牽渾並書殆其比附之迹不可掩者與此碑旣不見年月以縉當廣德二年拜黃門侍郎與碑合是碑所立之時亦可推見矣

怡亭銘

銘前有序云怡亭裴鷗卜而亭之李陽冰名而篆之裴虬美而銘之皆篆書其下銘詞八分書題永泰元乙巳歲夏五月十一日隴西李莒書集古錄云鷗不知何人按唐書宰相世系表鷗與虬並一格鷗容州長史虬諫議大夫虬

又見昌黎集河南少尹裴君墓誌銘載其父虬爲諫議大夫引正大疑有寵代宗朝樊氏注亦引歐公跋文并据昌黎此誌以虬爲諫議大夫不云爲道州刺史唐史亦不見其事歐陽豈得之怡亭銘耶愚謂杜工部湘江宴餞裴二端公赴道州朱氏注浯溪觀唐賢題名河東裴虬字深源大歷四年爲著作郎兼侍御史道州刺史是永叔當据此銘若怡亭銘無虬爲道州事樊氏蓋以意度之又云虬爲道州刺史唐史亦不見案舊唐書代宗紀大歷五年四月庚子臧玠據潭州爲亂澧州刺史楊子琳道州刺史裴虬衡州刺史楊濟各出軍討玠則固已見諸史而樊氏更失檢也

据紀文三年十二月道州刺史崔渙卒虬于時當代崔渙任紀文脫書于前

銘石在武昌

縣江中小洲上水潦浸薄往往沉沒拓工不易爲力吾友章逢之獨以二紙見遺逢之綜貫史學與余篤交誼其所投贈若此可感也

鍾離縣令朱巨川告勅牒

行書

告勅牒摹刻在快雪堂帖爲徐浩書前小字一行睦州錄事叅軍朱巨川下低二格字較前大過半云右可試大理評事兼豪州鍾離縣令下仍高二格書左衛兵曹叅軍庄若納等

云

後題大歷三年八月四日奉勅如右牒到奉行後又題年月如前不填爲某日又行書名不著氏曰遵

慶曰延昌曰紹曰渙凡四人後高兩格書告試大理評事兼豪州鍾離縣令朱巨川奉勅如右符到奉行後書名者

二人曰仙曰亞兼書名氏者二人袁琳後題年月某日下

唐勅牒之制如是按朱巨川新舊書皆不爲立傳

新書李華傳附

朱巨川名亦華所

校文苑英華載李紆所作吳郡朱府君

獎成至顯仕者

神道碑云巨川字德源嘉興人年二十明經擢第御史大

夫李季卿實舉賢能授左衛率府兵曹參軍戶部尚書劉

晏精求文史改睦州錄事參軍豪州獨孤及懸託文契舉

授鍾離縣令兼大理評事今此告職銜悉與碑合豪州不

從水唐書地里志豪州鍾離郡濠字初作豪元和三年改

从濠石本可據與志同舊唐書直作濠非是又後書導慶

裴遵慶也於時爲吏部尚書延昌王延昌綰楊綰也於時

二人並爲吏部侍郎最末書渙攷此時有蔣渙崔渙以舊

唐書代宗紀文証之此當爲蔣渙渙以大歷三年春正月
甲戌自工部侍郎爲尙書左丞左丞之職制勅須出都省
施行故得以預名也又後題亞杜亞也亞本傳永泰末劍
南叛亂鴻漸以宰相領山劍副元帥以亞及楊炎並爲判官
使還授吏部郎中諫議大夫今此列名正其爲吏部郎中
時矣郎中掌文官階品給其告身巨川之告爲所專職故
也

大證禪師碑銘

正書大歷四年
在登封

碑前列金紫光祿大夫門下侍郎平章事太清太微宮使
崇元宏文館大學士上柱國齊國公王縉謨銀青光祿大
夫行尙書吏部侍郎集賢殿學士副知院事上柱國會稽

縣開國公徐浩書舊唐書緒本傳廣德二年拜黃門侍郎
同平章事太微宮使宏文崇賢館大學士加上柱國所未
載者階與爵及使職內太清爾若同章事當依碑作平章
事也緒撰此碑已殘剝按文苑英華載此文予舉其略云
大德號曇真姓邊陳留開封人也潛迹嵩少間專於讀誦
年二十遂適太原受聲聞戒詣長安大照大照既歿又尋
廣德大師天寶口載乃蒙正度初隸東都衛國寺旋爲敬
愛寺寶應二年正月十四日跏坐如生大歷二年賜號大
證禪師最後又云緒嘗官登封因學於大照又與廣德素
爲知友按緒在登封雖不著爲何官然此必初筮仕時矣
更爲新唐書所未及又云大德弟子正順卽十哲之一唐

於武成王廟列十哲而緒崇奉佛氏亦號爲此名其後卒以誤國而殃其身佛不福佞人舉之宜爲世鑒

元次山墓碣銘

銘載道士申泰芝誣湖南都防禦使龐承鼎謀反并判官吳子宜等皆被決殺推官嚴郢坐流俾君按覆君建明承鼎獲免者百餘家新唐書結本傳不載此事惟附於嚴郢傳方士申泰芝舊唐書作奉誤以術得幸肅宗遨遊湖衡間以妖

幻詭衆姦賊鉅萬潭州刺史龐承鼎按治帝不信召還泰

芝下承鼎江陵獄郢具言泰芝左道

云

帝怒叱郢去卒

殺承鼎流郢建州與誌銘符舊唐書呂諲傳龐承鼎因奉

芝入奏至長沙繫之遣使奏聞輔國黨奉芝

奏

奉芝赴闕

既得召見具言承鼎曲加誣陷詔鞠承鼎誣罔之罪据是則泰芝不過指承鼎爲誣陷何至帝怒不已必致之死地以銘考之泰芝乃誣承鼎謀反傳殆未具其實後承鼎竟得雪泰芝竟以贓敗流死亦由結建明承鼎而新舊史皆於結本傳不書其疎甚矣銘載淮西節度使王仲昇爲賊所擒裴莢與來瑱交惡事亦見來瑱傳

蘇敦華嶽題名

右題名正書文云汝州司馬蘇敦弟華陰縣令發弟咸陽縣主簿敘前華原縣丞徹弟太常寺主簿徹弟吏部常選
皦弟少府監主簿敘弟儼時年十一大歷中發任華陰縣令時禮部尙書河東裴公謨歿於道其發徹同送至此

拜謁金天便過東驛不避炎暑亭午而回故列名於前刻
石題記五年夏六月六日嶽廟題刻文字完具此爲最矣
新唐書宰相世系表蘇氏河南尹震有七子敦發敦徹敦
政儼以題名按之蓋少敘一人又敘行次表列於第三題
名則爲第七敝及噉而表書作壞作政皆宜以題名爲正
自敦至教並有名位表亦失載蓋永叔仍其家譜譜之陳
脫甚矣河東裴公者裴士淹也舊唐書德宗紀大歷五年
五月庚辰貶禮儀使禮部尙書裴士淹爲處州刺史戶部
侍郎判度支第五琦爲饒州刺史皆魚朝恩黨也又第五
琦傳魚朝恩伏誅琦坐與款狎出爲處州刺史歷饒湖二
州新唐書列傳亦云第五琦坐與魚朝恩善貶括州刺史

徙饒湖二州括州即處州本名

地理志處州縉雲郡上本括州永嘉郡天寶元年更

郡名大歷十四年更州名

是舊史指士淹皆誤以為處今題名稱禮部

尚書出牧鄱陽實為饒州而紀文之謬當由與第五琦饒

州互訛非有石記何從是正哉士淹以黨坐貶敦昆季冒

暑送逐客亦世情所難書之以勵薄俗

龔邱縣令庾公德政頌

篆書李陽冰文並篆大歷五年九月在寧陽縣

碑殘剝僅有其半貞元三年林棣宋佑之來宰是縣訪得

完本於邑人彭龜家重勒諸石今按其文序庾公名實字

文明其先口川人成周之時世為掌庾因以命族公其胄

焉公之考曰欽嗣為光州別駕王父曰元汪為尋陽令曾

王父曰師則為蜀王文學又云大歷中邑老彭滔等三十

五人請於元戎云然則當日彭涓之立頌石竟未上於朝也劉夢得高陵令劉君遺愛頌載實應詔書凡以政績將立碑者具所紀之文上尙書考功有司考其詞宜有紀者乃奏今碑稱請於元戎及縣人以陽冰與公周旋備詳德行口之作頌豈此時節度此方者宜可以專擅固不必待朝命耶書之亦以考世變焉文內有改字與平相連說文改撫也從支亾聲讀與撫同此下一字存其上半平是爲柔字撫柔蓋稱其惠于斯民也

盧綸題名

右題名殘斷不相屬自右向左題前華州參軍陸漸前王屋縣令陸永前同官主簿陸涓將仕郎守閬鄉縣尉盧綸

前國子進士趙鄧歷覽前賢題名庚子

下缺

又白左而右題

大歷六年二月六日綸赴

下缺

舊唐書盧簡辭傳云父綸大

歷初宰相王縉奏爲集賢學士祕書省校書郎會縉得罪
坐累久之乃調陝府戶曹河南密縣令不見作尉閔鄉事
惟新唐書有之云大歷初數舉進士不入第元載取綸文
以進補閔鄉尉與此合

同光禪師塔銘

正書大歷六年六月在登封少林寺

銘前列登封縣令郭湜撰當寺大德靈迅書文云禪師法
諱同光晉人不著俗姓某從彼教法作釋氏此誌僧正例
也同光歸心禪祖大照屢蒙授記及大照遷神乃演大法
義開大法門二十餘年後以大歷五年六月二十七日化

於少林寺禪院最末列延州金明府別將屈集臣鑄造塔
博士宋玉名黃省曾吳風錄謂張士誠走卒廝養皆授官
爵至今呼椎油作麵傭夫皆爲博士剗工爲待詔又陸容
菽園雜記醫人稱郎中鑄工稱待詔磨工稱博士師巫稱
太保茶酒稱院使二書所記皆謂在明初蓋亦未悉其沿
於何時予以此銘稱造塔博士則當唐世呼工作人有是
名矣後唐鈞大德塔銘博士侯建鏞字造塔博士郝溫宋
通利軍鍾題識後有匠人毋郭氏小博士口元小博士王
在俱在明代之前可以附証

崔微嶽廟題名

右題名正書自左起文云前開州刺史崔微男諱前緱氏

縣令康治前鄉貢進士侯季友大歷七年三月廿日西上
宰相世系表清河大房有微河南少尹子漑太常少卿此
題旣從廿不從水又元和十年題名華陰縣令崔旣亦卽
其人皆與表異文苑英華穆員陸渾尉崔泳墓誌云河南
少尹微之子又云君長兄河南府尹司錄參君案君當漑
不勝其哀崔少尹盧氏墓誌云唐河南少尹清河崔微從
先大夫於北邙山平樂原又云孤漑泳是微與漑歷官叅
之此題所可見者如此而文苑英華以河南少尹爲崔微
則微字傳訛也漑亦從水並誤

黃石公祠碑陰記

八分書大歷八年七月
在市阿縣北關祠內

記文列殿中侍御史高陽齊嵩字王府倉曹參軍

裴平書此用小篆題銜名平見宰相世系表未著其官稱
表或有所遺嵩見金石錄雙廟記卽爲所撰也記載穀城
下黃公祠實在濟之東阿元宗季年濟陽廢而東平兼領
之元和郡縣志東阿天寶十三載廢濟州縣屬鄆州鄆州
東平郡也記載趙郡李卓卽今臺長棲筠唐書列傳棲筠
世爲趙人代宗引拜爲御史大夫記當大歷八年故以臺
長目之而棲筠前名卓史文失紀矣記載頃歲馬公炫自
郎官出牧少與臺長交與莫逆嘗勤爾于廟不覩所記乃
搜李文以勒貞石未及畢而謝病言歸馬燧傳兄炫字弱
翁少以儒學聞隱蘇門山不應辟召至德中李光弼鎮大
原始署臺書記嘗參軍謀光弼器焉刑部郎中

舊書奏授
比部刑部

郎中田神功帥宣武署節度判官授連潤二州刺史据是記
炫自郎官出牧蓋以刑部郎中爲鄆州刺史而傳僅稱連
潤二州非也炫隱蘇門山與棲筠始居共城山下地旣相
比意二人交契當在此時故記爲言之與後有勾曹椽韋
騰戎曹椽俞漢中名勾曹戎曹亦不見百官志

黃石公祠記

八分書

記首行列題及稱布衣趙郡李卓撰皆小篆文與碑陰書
者爲一手也卓卽棲筠傳稱世爲趙人此記亦云趙郡又
棲筠族子華每稱有王佐才士多慕向始居汲共城山下
華固請舉進士俄擢高第此記云布衣蓋其初服如是與
傳可相証記略叙天寶歲旱太常河東裴公禱祠致雨

因言祠事始末云秦滅六國遂并區宇張良袁韓之亡怒秦之暴義感天地降神于圯神授良之書良爲帝之師滅秦報韓成功遂志祠黃石于濟北穀城之山下東坡留侯論謂世不察以爲鬼物者當沿于此矣太守之名百官志天寶元年改刺史曰太守是也族子華卽李華見新唐書

案論衡自然篇張良遊泗水之上遇黃石公授太公書蓋天佑漢誅秦故命令神石爲鬼書授人更前于此

元澄華嶽廟題名

右題名行書自左起文云尙書虞部員外郎兼殿中侍御史元澄與大理評事盧恒華陰縣丞裴言則以唐大曆八年十二月三日題紀榮恒見宰相世系表爲殿中侍御史盧朝徹謁嶽廟文

文正書微損十餘字今舉其略云唐大歷九年甲寅季春
口口生明華陰令盧朝徹下車散齋浹日精意撰擇元辰
吉蠲告於金天王朝徹不佞獲領茲縣清是家風所遺芳
乃天誘其衷與衆難合於時不容才拙恬淡委運窮通僅
力於政口降百祿稍私其身口生肆口福謙害盈則仰嶽
靈不識不知何敬神爲唐時守令蒞任誓廟之詞如是元
張養浩著三事忠告言故事牧民官既上必告境內所當
祀之神宜以不賄自誓庶堅其遷善之心卽此義也

李謀等西嶽題名

右題名正書拙滯文云前鳳翔府司錄叅軍李謀前長安
縣主簿李融大歷九年十月十三日題西嶽書德宗紀貞

元九年五月甲辰以鄭州刺史李融爲滑州刺史義成軍
節度使蓋卽此題稱前長安縣主簿者也攷紀文前書五
月庚申則甲辰當爲六月紀於此脫文矣融又見李適之
傳子季卿孫融立性嚴整善吏事貞元十年歷官至渭州
節度使卒渭當作滑傳刻誤也宗室世系表列適之相元
宗下惟書善而季卿及融俱失載融又見裴光庭傳加宏
文館大學士引壽安丞李融令直宏文館是融初從仕亦
以文學見引非獨善吏事矣予故綜其前後論之以見名
不虛附也

內侍監高力士殘碑

行書大歷十二年二月在高陵

碑下截斷沒錄其句可屬者如載力士蒞官遷冠軍鎮軍

輔國驃騎大將軍舊唐書本傳不紀鎮軍輔國唐書但云

累驃騎大將軍皆于文爲略力士幼與母相失唐書云嶺

南節度使得之瀧州

汲古閣本作隴州誤

舊唐書云嶺南節度使于

潘州求其本母麥氏送長安兩地微異考力士旣爲潘州

人則母先失而後歸士嶺南節度訪而得之亦或然也舊

唐書寶應元年三月會赦歸至朗州遇流人言京國事始

知上皇厭代力士北望號慟嘔血而卒蓋哀隕卽在朗州

矣碑云薨于朗州龍興寺較史更爲詳實

無憂王寺真神寶塔碑銘

行書大歷十三年四月在鳳翔縣

碑爲徵事郎殿中侍御史內供奉賜緋魚袋張或撰宏農

楊播書宰相世系表楊氏初裔孫播世居扶風子炎相德

宗者卽其人也但表言世居扶風而此稱宏農舉於望以
自異也其序扶風地舊有聖塚驗其銘曰育王所生因以
名焉大魏二年岐州牧少冢宰拓拔口修葺臺殿隨開皇
中改爲成實道場仁壽二年右內史李敏讓修之重廣其
銘唐自太宗問罪薛舉師次漳川欽承靈蹤及貞觀五年
牧伯張德亮又加崇飾中宗旌爲聖朝無憂王寺題舍利
塔爲大聖寶塔肅宗以口口五月十口口口中使宋合
禮府尹崔光遠啓發迎赴內道場舊唐書肅宗紀乾元三
年二月癸丑以太子少保崔光遠爲鳳翔尹秦隴節度使
是也王縉傳啓代宗令僧百餘人于宮中陳設佛像經念
誦謂之內道場不知內道場已起于肅宗時矣後列檢校

刑部員外郎兼侍御史張公增少尹檢校司勳員外郎兼侍御史邱公鴻漸侍御史內供奉梁公口侍御史內供奉姜公邑高監察御史裏行嚴公霑祕書省校書郎掌書記韓公計本口兵馬使開府儀同三司口中監李奉忠監軍使左監門衛大將軍焦奉超諸人名

上官沼題名

右題名正書文云侍御史上官沼大歷十三年七月廿九日赴東臺謁嶽過宰相世系表有上官沼當卽其人表誤沼爲詔宜依題名爲正案東臺之名因話錄云武后朝御史臺有左右肅政之號當時謂之左臺右臺則憲府未嘗有東西臺之稱惟俗間呼在京爲西臺東都爲東臺攷舊

唐書獨孤郁傳憲府故事三院御史由大夫中丞自辟請
命于朝時崔晃鄭居中不由憲長而除勅命雖行朗拒而
不納晃竟改太常博士居中分司東臺盧杞傳父奕天寶
末爲東臺御史中丞昌黎集故虞部張君墓誌銘拜監察
御史經二年拜真御史明年分司東臺轉殿中呂和叔集
故太子少保贈尚書左僕射韋府君神道碑銘遷監察御
史內供奉京都留守卽拜東臺侍御史司空表聖集盧知
猷神道碑遷侍御史專領東臺之務以此題名証之則當
時見于史傳文集皆稱東臺決非從俗爲之因話錄檢審
不精妄爲此議也

我堂金石文字續跋卷四終

大興張光煦校